

11.
D E

FRACTO CORPORE HUMERI

T H E S E S

ANATOMICO-CHIRURGICÆ,

*QUAS, Deo juvante & Præside M. CAROLO
DEVILLIERS, Scholarum Moderatore, tueri
conabitur LUDOVICUS GIRARD, Parisiensis,
Artium Liberalium præclaræ Universitatis Parisiensis
Magister, & AUGUSTISSIMI PRINCIPIS ATRE-
BATUM COMITIS, FRATRIS REGIS, Chirurgus
trimestris.*

*Die 24^a Augusti, anno Salutis 1782, à sesqui-secundâ
post meridiem ad septimam.*

IN REGIIS CHIRURGORUM SCHOLIS,
PRO ACTU PUBLICO

ET


SOLENNI COOPTATIONE.



P A R I S I I S,

Typis LAMBERT, Regii Chirurgiæ Collegii necnon Academiæ
Typographi, viâ Cithareâ.

M D C C L X X X I I.




D. O. M.



D E

FRACTO CORPORE HUMERI.



T H E S E S

ANATOMICO-CHIRURGICÆ.

OSSA, etsi cæteris partibus microcosmi solidiora, plurimis tamen morbis obnoxia sunt; queis solutâ eorum integritate, solvuntur etiam, aut quàm maximè læduntur variæ functiones partium quibus fulcrum erant. Sic quidem evenit de Humeri fracturâ, de quâ privatim dicturi sumus in hoc Programmate; præmissis ex Anatomîâ quæcumque ad hanc quæstionem nobis spectare videntur.

A ij

EX ANATOMIA.

I.

BRACHIUM pars ea est quæ scapulam & cubiti flexuram intercedit. Conflatur ex unico osse, multis musculis, nervis & vasis sanguiferis, necnon variis membranis & ligamentis, quæ omnia multiplici textu cellulari adjecta, tegumentis communibus involvuntur.

I I.

HUMERUS vocatur os illud teres, brachii fulcimentum, quod cum scapulâ & ossibus cubiti connectitur. Substantia ejus, eadem ac in aliis ossibus teretibus, triplex occurrit; compacta scilicet, reticularis & spongiosa. In corpus & extrema dividitur.

I I I.

CORPUS intus excavatum, ob medullam in ipso contentam, extus non eandem figuram refert. In ipso quidem distinguuntur duæ partes; una nempe superior, ferè cylindrica, plurimis asperitatibus hirsuta; alia inferior, tota levis, ad triangularem formam accedens, in quâ proindè tres facies, & totidem anguli conspici possunt.

I V.

EX extremis Humeri aliud superius, aliud inferius est. Superius rotundum & inferiore crassius est. Tres in eo partes præcipuæ considerantur; una nempe interna & duabus aliis excellior, instar trientis sphaeræ, caput Humeri. Alia-externa, rudis, quæ a sulco quodam visibili dividitur in duas partes, quarum una major & exterior triplici facieculâ, alia verò minor & anterior, unicâ tantum complanatur. Tertia tandem istis intermedia, quam collum dixerunt.

V.

INFERIUS extremum Humeri superiore tenuius & complanatus est. Conformatur adinstar duplicis trochleæ. In eo distinguenda sunt. 1°. Duo sulci triaque capitula, quorum ope cum ossibus cubiti convenit Humerus. 2°. Duæ cavitates, quarum

posterior Olecranium, & anterior Apophysim coronoidem, ulnæ processus, excipit. 3°. Duo tubercula sive condyli, quorum internus eminentior flexoribus, externus verò minor extensoribus carpi musculis insertionem præbet. 4°. Duæ etiam lineæ, quæ spinæ seu cristæ dicuntur, ex utroque condylo ad mediam usque partem faciei posterioris Humeri decurrentes.

V I.

JUXTA condylos & lineas ex eis prodeuntes, necnon circà partes quas collum & tubercula diximus, variæ deprehenduntur parvulæ rimæ & asperitates, quibus inhærent membranæ & ligamenta utriusque articulationis. Inibi etiam sat manifestè patent plurima foraminula, quæ permeant nervi & vasa sanguifera, ad ossis & medullæ nutrimentum.

V I I.

SIC disposita videtur ossea congeries Humeri, ut ipse contortus appareat in medio sui corporis, & ejus extremitates in inverso sensu converti dicerentur. Id etiam quoad perfectissimam illius ossis fracti conformationem restituendam sedulo animadvertendum est, quòd sic inter se adversentur eadem extremitates, ut condylus internus medio capitis, & externus summo magni tuberculi directè submittatur.

Super Humerum expanduntur musculi *deltoïdes*, *biceps*, *coracobrachialis*, *triplex extensor*, & *brachialis internus*. In ipso tantum inferuntur, *magnus Pectoralis*, *latissimus dorsi*, *teres major*, *suprà spinatus*, *infra spinatus*, *teres minor* & *sub scapularis*. His etiam addi possunt *supinatores longus* & *brevis*, *pronator rotundus*, *parvus Anconæus*, necnon *flexores* & *extensores carpi*; isti verò nihil, aut parum faciunt quoad fracturam de qua nunc est.

V I I I.

NERVOS & vasa sanguifera toti Brachio suppeditat truncus axillaris, ex quo orditur arteria Brachialis ad latus internum, & partem usque humeri propè inferiorem prorepens, unde fit anterior ut cubiti flexuram ineat.

EX CHIRURGIA.

I.

HUMERUS gracilior est in media corporis sui parte, & in inferiori complanatio. Nec mirum indè si faciliùs & frequentius ibi frangatur. Tot tamen in partibus fracturam experiri potest quot in omni ejus longitudine dantur. Hic verò, paginæ brevitatis causâ, non agitur nisi de illa quæ fit in ipso ejus corpore. Ad hoc autem nobis sufficiat exposuisse hujus morbi causas, species, accidentia, diagnosim, prognosim, & curationem.

I I.

CAUSÆ vel internæ sunt vel externæ.

Internæ nonnisi tanquam prædisponentes habentur, sicque sunt caries in osse, ficcitas ejus, mollities, intumescencia, &c.

Externæ verè sunt efficientes; veluti, lapsus, ictus, violentinifus, & impulsio corporum e sclopetis.

I I I.

DIFFERENTIÆ recenseri possunt quoad situm, formam, essentiam, & extremitatum fractarum dimotionem.

1°. In parte media, superiore vel inferiore, frangi potest **Humeri** corpus.

2°. Hoc fit transversim vel obliquè, vel in modum unguis aut tibie rostri, vel frustillatim.

3°. Simplex, sive composita, sive complicata dicitur. Simplex, si sola reperiat, & nihil obstet ejus coalitioni. Composita, si duobus aut pluribus in locis osse fracto, nihil impediatur quin coadunetur & coalescat. Complicata si ejusdem coalitioni datur obstaculum quodlibet sit. Hæc autem fractura ab ipsamet ejus causâ & corporibus extraneis cum illâ propulsis, vel aliquo morbo, vel accidentibus complicari potest.

4°. Aliquoties transversim ita frangitur **Humeri** corpus, ut nulla sit partium ejus dimotio, sæpè sæpius tamen illæ partes a se invicem disturbantur; idquè secundum ossis spissitudinem vel longitudinem.

ACCIDENTIA in primitiva, subsecutiva, & remotiora distinguuntur. Ad prima referuntur partis deformitas, impossibilitas ad motum, dolor, hemorrhagia, aliaque. Ad secunda doloris perseverantia, aut ipsius incrementum, febris, motus convulsivi, convulsiones, partis inflammatio, ingurgitatio, gangræna. Ad tertia tandem membri deformitas, contortio scilicet, elongatio, contractio, vel curvatura, callus exuperans, succi ossei diffusio, partium mollium compressio vel prava cohærentia, unde motus musculorum plus aut minus in posterum coercetur. Quandoque etiam nulla fit partium fracturarum coalitio.

V.

DIAGNOSIS visu & tactu suscipitur. Nec quidem signis duobus; vel enim cute abscissâ per eam excedunt ossis fragmenta; aut tanta est partium fracturarum dimotio, ut ipsismet oculis manifestè pateat; vel manibus facilè deflectitur os ruptum, & digitis vel auditu persentitur crepitatio.

V I.

PROGNOSIS pro variâ specie differt. Complicata enim fractura compositâ deterior, & hæc simplice pejor. Quò plus etiam vicina sedet ossis extremitatibus, eò majoris est discriminis. Desumitur quoque prognosis ab humorum crasi, ægrotantis ætate vel habitu, lapsu temporis, anni temperie & aliis circumstantiis.

V I I.

CURATIO in eo consistit quod debellatis accidentibus, partes fractæ in situ naturali repositæ, in illo contineantur & coalescant.

V I I I.

TRIBUS præsertim mediis perficitur repositio; extensione scilicet, contra extensionem & coadunationem. De modo extensionem & contra extensionem peragendi nihil nisi vivâ voce dicemus. De his tantum hîc adnotare liceat, quòd utraque semper celebranda sit in ossis loco a fractura remotiori, sensim sine sensu, multaque cum prudentiâ, cavendo ne partes molles ossis asperitatibus dilacerentur, vel nimium lædantur.

I X.

ETSI non difficilis ut plurimùm fiat partium reductio, non ideò semper facilis obtinetur earundem perfecta coadunatio. Dum enim pars valde tumescit, vel pinguedine crassior habetur, tunc ægrè perferuntur os ipsum, & an aptè juxtà ponantur ejus fragmenta difficiliùs judicari potest. Sedulo igitur attendendum ad ossis naturalem conformationem & partium ejus peculiarem situm, ut exindè perfectior effici possit coadunatio. Quæ quidem nullo ferè cum negotio subveniet, si habitâ ratione longitudinis **Humeri**, condyli ejus revocantur ad respectum quem ipsis cum capite & magno tuberculo assignavimus.

X.

PERACTA coadunatione partes contineri debent idoneâ deligatione. In **Humeri** fracturis simplicibus ut plurimùm convenit illa quæ constat spleniis, ferulis & fasciis, super impositâ mitellâ. At in complicatis satius est apponere fasciam octodecim capitum vel libri formem, aut aliam a Sculteto commendatam. Quâ quidem membrum omne ita contineatur, ut nullibi detur ingurgitationi locus.

X I.

QUANTUM autem temporis sic revinctum remanere debeat **Brachium**, ab ægrotantis statu vel ætate, specie tracturæ, & accidentibus deduces; nulla enim ratio de illius mensura datur, nisi illa per quam callus satis invaluerit. Hoc quidem plerumquè perficitur, quoad fracturas simplices & compositas, intrâ quadraginta vel quinquaginta dies, tardiùs verò quoad complicatas.

X I I.

HUMERI corporis, sicut & aliorum ossium consolidatio nulli artis molimini debetur. In hoc tantùm versatur Chirurgia, ut quàm aptè & sat diù contentis fragmentis, idoneâ tùm medicamentorum, tùm victûs ratione, penitùs arceantur obstacula; naturaque possit ergà eam muneribus suis opportunè & placidè fungi.

F I N I S.